

SANTÍSSIMA TRINDADE

TEMA

Solenidade ne'ebé ohin ita celebra la'ós konvite ida atu deskobre mistériu ne'ebé subar iha “Maromak ida iha ema na'in tolu”. Maibé konvite ida atu kontempla Maromak ne'ebé domin, ne'ebé família, ne'ebé comunidade no hakiak ema sira atu halo sira moris iha komuñau ho mistériu domin ne'e.

Leitura dahuluk sujere mai ita kontemplasaun Maromak kriador. Ninia laran-di'ak no nia domin hakerek no manifesta ba ema sira iha kriasaun nia fafurak.

Leiura daruak konvida ita atu kontempla Maromak ne'ebé hadomi ita, no nune'e, “jusitfika” ita, ho forma gratuita no inkondisionál. Liuhusi Oan-Mane mak Aman Maromak nia don sira suli mai ita no haraik mai ita moris nakonu.

Evanjellu bolu ita dala ida tan atu kontempla Aman Maromak nia domin, ne'ebé hatudu an iha Oan nia saran an no kontinua ema nia dalan iha istoria liuhusi Espíritu. Meta ikusnian “istória domin nian” mak ita nia komuñau ho Maromak-domin, Maromak-família, ho Maromak-komunidade.

LEITURA I – Prov 8,22-31

MENSAJEN

Uluknanai, dehan katak “sabedouria” nia orijen mak Maromak. Autór testu nian tau iha “sabedouria” nia ibun liafuan ebreu “qânâny” (“hahoris ha'u”) atu espresa Maromak nia responsabilidade iha “sabedouria” nia orijen (vers. 22).

Nia afirma mós katak nia mak Maormak nia obra uluk liu. Molok hahú estrutura kozmos nian, “sabedouria” eziste tiha ona (vers. 24-29); nia mós iha papél interveniente iha kriasaun: iha vers. 30, apresenta “sabedouria” nu'udar “arkitetu” (“amon”), katak, asistente ativu Maromak nian iha obra kriadora. Iha fatin datoluk, “sabedouria” afirma katak ninia interese no ksolok mak hela ho “ema nia oan sira” (vers. 31): nia dirije ba ema sira no nia objetivu mak ema sira, iha papél atu tulun ema sira.

Sá loos papél ne'e? Iha períkopa ne'e ita hetan liafuan tolu iha nia hahú, iha klaran no iha rohan: “Jahwéh” (vers. 22), “sabedouria” (“ha'u” – vers. 30) no “ema sira” (vers. 31). Liafuan tolu ne'e hatudu autór nia objetivu: bainhira dehan katak “sabedouria” nia orijen iha Jahwéh, hela iha relasaun metin ho Maromak no destina ba ema sira, nia sujere mai ita katak “sabedouria” iha kapasidade atu tau ema iha relasaun no kontaktu ho Maromak. “Sabedouria”, ne'ebé prezente husi uluk kedas iha kriasaun, revela ba ema sira Maromak kriador nia domin boot.

Tradisaun judaika identifika “sabedouria” ho Torah (kf. Ba 3,38-4,1; Pirkê Rabbí Eliezer, III, 2). Autór Testamentu Foun fali, ne'ebé koñese livru sapiensiál sira, atribui ba Jezús karakterístika ruma ne'ebé testu ne'e atribui ba “sabedouria”: Paulo bolu Jezús “sabedouria” no “Maromak nia sabedouria” (kf. 1 Cor 1,24.30); nia konsidera mós Jezus nu'udar “sabedouria” Prov 8 nian, eziste molok sasán hotu no iha papél privilegeiadu iha kriasaun mundu nian (kf. Col 1,16-17); “prólogo” Evanjellu Dahaat nian atribui ba “Lógos”/Jezús karakterístika sira “sabedouria” kriadora Prov 8 nian (dehan katak Jezús eziste molok kriasaun – kf. Jo 1,1) no nia mak fó ezisténsia ba obra kriadora hotu – kf. Jo 1,3).

Padre sira Igreja nian haree iha “sabedouria” ne'e, Jezús ka Espíritu Santu nia trasu sira.

LEITURA II – Rom 5,1-5

MENSAJEN

Paulo hahú husi ideia katak fiar-na'in hotu – judeu, gregu no romanu sira – hetan *justifikasaun iha fiar*. Katak sá buat ne'e?

Iha linguajen bíblika, *justisa* mak, liufali konseitu jurídiku ida, nia mak konseitu relasionál. Se Jahwéh hatudu An iha nia Povu nia istória nu'udar Maromak laran-di'ak nian, laran-sadia nian no domin nian. dehan katak Maormak *justu* la signifika dehan katak nia aplika mekanizmu legál sira bainhira ema la tuir regra sira; signifika katak, laran-di'ak, laran-sadia, domin, mak Maromak nia An rasik, ne'ebé hatudu iha sirkunstánsia hotu. Maski ema la iha komportamentu loos. Paulo, bainhira ko'alia katak ema hetan *justifikasaun*, nia dehan katak ema maksalak simu husi Maromak don gratuitu salvasaun nian. Ema presiza de'it atu simu iha haraik-an no konfiansa, grasa ne'e, ne'ebé la depende ba ninia hahalok di'ak sira no atu entrega an tomak iha Maromak nia lian. Ema, objetu grasa Maromak nian, sai kriatura foun (kf. Gal 6,15): nia ema resusitadu ba vida foun (kf. Rom 6,3-11), ne'ebé moris husi Espíritu (kf. Rom 8,9,14), sai Maromak nia oan no hetan liman-rohan hamutuk ho Kristu (kf. Rom 8,17; Gal 4,6-7).

Sá de'it rezultadu husi asesu ba salvasaun ne'e? Ida uluk mak *dame* (vers. 1). *Dame* ne'e la'ós ida ho sentidu psikolójiku (hakmatek, serenidade), maibé iha sentidu semítiku katak, relasaun pozitiva nian ho Maromak, tan ne'e, pletitude rahun-di'ak nian, tanba Maromak mak buat di'ak hotu nia hun.

Iha fatin daruak, *esperansa* (vers. 2-4). Ne'e mak don ne'ebé halo ita manán difikuldade sira hotu no dalan nia susar, hodi hateke ba futuro glória moris plenitude nian. Ne'e la signifika iha otimizmu fasil no lahó responsabilidade, halo ema halai husi momentu prezente; ne'e katak hetan sentidu foun ba moris prezente nian, iha serteza katak kbiit sira mate nian la soi liafuan ikus no katak kbiit moris nian mak sei manán.

Iha fatin datoluk, *Maromak nia domin ba ema* (vers. 5-8). Sarani ida mak ema ne'ebé Maromak hadomi. Nu'udar prova domin nian mak Jezús ne'ebé Maromak “saran ba mate bainhira ita sei ema maksalak”.

Buat hotu ne'ebé hakonu fiar-na'in nia moris, ne'ebé fó sentidu ba nia, mak Maromak nia domin ne'ebé, liuhusi Jezús, hatudu ninia domin no liuhusi Espíritu Santu, halo suli nafatin ninia domin iha ita.

EVANJELLU – Jo 16,12-15

MENSAJEN

Tema fundamentál leitura ne'e iha relasaun ho Espíritu nia tulun ba dixípulu sira iha sira nia dalan iha mundu.

Jezús hahú atu dehan ba dixípulu sira katak iha buat barak ne'ebé oras-ne'e sira la bele komprende (vers. 12). “Espíritu lialoos nian” mak sei gia sira ba lialoos, sei komunika ba sira buat hotu sira rona husi Jezús no interpreta buat ne'ebé sei mosu mai (vers. 13). Ne'e signifika katak Jezús la revela buat hotu ne'ebé nia tenke revela ka ninia proposta salvasaun la'ós kompletu?

La'ós nune'e. Jezús nia liafuan kona-ba Espíritu nia hahalok refere ba tempu ezisténsia kristán iha mundu, iha tempu husi Jezús nia mate to'o iha “parusia”. Oinsá mak dixípulu sira iha *tempu Kreda nian*, kontinua kapta, iha fiar, Jezús nia Liafuan no husik nia leno sira nia

moris? Jezús nia resposta mak: “hodi Espíritu lialoos, ne’ebé sei halo atu ha’u-nia proposta kontinua nalian loron ba loron iha comunidade nia moris no iha fiar-na’in ida-idak nia fuan; aleinde ne’e, Espíritu sei hanorin imi atu komprende *orden foun* ne’ebé mai husi krús no resurreisaun no atu dixerne, hahú husi sirkunstánsia konkreta sira ne’ebé moris lori mai imi, oinsá ba oin atu kontinua sai fiél ba ha’u-nia proposta sira”. Espíritu sei la apresenta doutrina foun, maibé halo atu Jezús nia Liafuan kontinua sai referénsia ba comunidade hodi hatene aplika nia iha situasaun hotu.

Espíritu sei foti lialoos husi Jezús rasik (kf. vers. 14). Nune’e, Jezús kontinua iha komuñan, iha sintonia ho dixípulu sira, hodi komunika ba sira nia moris no nia domin. Ne’e mak funsaun Espíritu nian: realiza komuñan entre Jezús no dixípulu sira ne’ebé sei halo sira nia dalan iha istória.

Espresaun ikus testu ne’e nian (vers. 15) subliña komuñan ne’ebé eziste ente Aman no Oan. Komuñan ne’e atesta unidade entre Aman nia planu salvasaun, ne’ebé hato’o liuhusi Jezús no sai realidade iha Kreda nia moris, liuhusi Espíritu nia asaun.